



29 JUN, 2025

Galeri artifak dari gua Lembah Nenggiri jadi tarikan pelancong

Berita Harian Ahad, Malaysia



Galeri artifak dari gua Lembah Nenggiri jadi tarikan pelancong

Pameran penemuan bersejarah mampu jana ekonomi sekitar Gua Musang

Oleh Paya Linda Yahya
bhnews@bh.com.my

Gua Musang: Pembukaan sebuah galeri yang menyimpan artifak gua di sekitar Lembah Nenggiri yang terbabit dengan Projek Pembinaan Hidroelektrik Nenggiri akan menjadi tarikan pelancong ke daerah ini.

Sehingga Ogos tahun lalu, sebanyak 71,289 artifak di Lembah Nenggiri sudah ditemukan Jabatan Warisan Negara hasil kerja penyelidikan dan ekskavasi yang bermula pada Mac 2022 sehingga Oktober 2023 oleh Universiti Kebangsaan Malaysia (UKM).

Ahli Dewan Undangan Negeri (ADUN) Nenggiri, Mohd Azmawi Fikri Abdul Ghani, berkata galeri yang menyimpan artifak dari gua di Lembah Nenggiri itu akan dibina di sekitar Bandar Gua Musang.

Dengan adanya galeri terbuka, beliau percaya lebih ramai

pelancong datang ke negeri ini untuk melihat sendiri hasil penemuan terbabit.

“Saya percaya bila galeri ini beroperasi lebih ramai akan datang ke Gua Musang, sekali gus memberi peluang menjana ekonomi penduduk setempat.

“Dalam penemuan lebih setahun kerja penyelidikan daripada pihak UKM itu, turut menemui rangka manusia yang berusia lebih 14,000 tahun di Gua Keledung Kecil yang diberikan nama Mek Keledung.

“Ini adalah penemuan yang penting dalam menelusuri sejarah dan warisan kita di bumi Gua Musang khususnya di Nenggiri,” katanya.

Penemuan rangka purba

Terdahulu beliau bersama peserta Program 4Xplore Teroka Alam: Legasi Di Bumi Kita Bersama Rakan Alam Sekitar sempat meninjau lokasi penemuan rangka Mek Keledung di Gua Keledung Kecil, di sini.

Mohd Azmawi Fikri berkata, terdapat 22 gua batu kapur dan 12 gua daripadanya dijangka tenggelam untuk dijadikan tasik takungan utama apabila siapnya Projek Empangan Hidroelektrik Nenggiri.

Katanya, jajaran Empangan Hidroelektrik Nenggiri bermula dari Gua Cha sehingga Gua Keledung.

“Selain penemuan artifak ini



Empangan Hidroelektrik Nenggiri juga akan menjadi salah satu tarikan pelancong ke daerah ini. Gua Musang mungkin terkenal dengan ekopelancongan apabila siapnya empangan ini.

“Kita harap selepas ini pelancong akan datang ke Gua Musang terutamanya ke kawasan Nenggiri bagi melihat sendiri lokasi artifak bersejarah ini,” katanya.

Mohd Azmawi Fikri (dua dari kiri) bersama peserta Program 4Xplore Teroka Alam melihat lokasi penemuan rangka manusia berusia lebih 14,000 tahun dinamakan ‘Mek Keledung’ di Gua Keledung Kecil (gambar bawah), baru-baru ini.
(Foto Paya Linda Yahya/BH)